

Oleh Dziyaul Afnan  
Abdul Rahman  
am@hmetro.com.my

# Melepas 'rasa' hasil ketum

Padang Besar

*Anggota PGA rampas daun ketum bernilai RM106,800 dalam dua hari*

Sebanyak 3.56 tan daun ketum bernilai lebih RM106,800 dirampas dalam Op Benteng di beberapa lokasi berdekatan tembok sempadan Malaysia-Thailand, di sini.

Serbuan dilakukan sepasukan anggota Batalion 1 Pasukan Gerakan Am (PGA) Wilayah Utara dalam tempoh dua hari bermula kelmarin.

Komander PGA Briged Utara, Senior Asisten Komisioner Abdul Ghani Mohd Ji berkata, pihaknya turut merampas pacuan empat roda yang ditinggalkan penyeludup sebagai kegunaan membawa daun ketum untuk diseludup ke negara jiran.

Menurutnya, dalam serbuan pertama jam 5 pagi kelmarin, pihaknya tersempak dengan sekumpulan lelaki disyaki penyeludup ke-



ANGGOTA PGA Wilayah Utara merampas daun ketum dalam empat siri serbuan menerusi Op Benteng di beberapa kawasan berdekatan tembok sempadan Malaysia-Thailand.

tika melakukan rondaan rutin di ladang sawit berhampiran tembok sempadan.

"Bagaimanapun, semua mereka melarikan diri dengan meninggalkan daun ketum sewaktu anggota cuba menghampiri.

"Hasil pemeriksaan kemudian menemui sejumlah 30 guni berisi 900 kilogram (kg) daun ketum dianggarkan bernilai RM27,000," katanya dalam kenyataan di sini, semalam.

Menurutnya, pihaknya kemudian menyerbu dua pondok kosong di ladang getah di Jalan Kubang Keladi dan ladang pokok getah di Kubang Tiga di sini, pada jam 8.15 pagi hari sama.

"Hasil serbuan ke atas pondok pertama menemui 1,230kg daun ketum bernilai

RM36,900 dalam 41 guni sebelum jumlah yang sama turut ditemui di pondok kedua di Kubang Tiga.

"Manakala dalam serbuan terakhir pada jam 12.30 tengah malam tadi (semalam), anggota berjaya menghalang seorang lelaki daripada mencampakkan enam guni daun ketum seberat 200kg bernilai RM6,000 ke negara jiran menerusi tembok sempadan," katanya.

Bagaimanapun katanya, lelaki terbabit sempat meloloskan diri melalui belukar berhampiran dengan meninggalkan pacuan empat roda.

"Semua barang rampasan dibawa ke Balai Polis Padang Besar untuk siasatan mengikut Seksyen 30(3) Akta Racun 1952," katanya.